



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 12

French Open 2017: Nadal, Garbine nungir takok nung lir

TAPAK 8

MoS Telecommunication ajanga India Mobile Congress sayatsü



VOL. XIV NO. 225 (ADOK 225)

DIMAPUR

SATURDAY

JUNE 03, 2017

5.00

Naga yimten telatetba ka dangi yakta arutsü : NSCN/GPRN

Dimapur, June 02 (TYO) : Tsüngremi Naga nungir nem agütsüba yimten temeten tematiba 'sovereignty' jenjang samar aliba 2015 küm August 3 nü India government den 'Framework Agreement' yangluba ajanga shia arudaktsüogo, kechiyong iba tangatetep ken o jagi India government-i Naga nungir tematiba yimten temeten lir ta agizüketogo aser India den külemi lia kasa temetenji lemsar yimten mapa lateta bener aotsü ta NSCN/GPRN teloki metetdaksü.

Naga nungir yimten temeten jenjang tematiba nung alitsüba temeten aser teimla ajak 1960 küm 16 Point Agreement aser 1975 küm Shillong Accord yangluba ajanga India temzüng kübok alitsü renemba ajanga samadoker liasü. Iba jagi Naga

nungir asoshi yimten temeten atema raratsü lenmang shibangtsür liasü, ajisüaka Tsüngremi shimtetba lenir taoba Yaruiwo, Isak Chishi Swu aser Ato Kilonser, Th. Muivah na lenisüba nung India government-i kasa yimten temeten Naga nungirtem den lemsatepa külemi lia aotsü agizükba jagi India o Naga nungir na temeten aser yimten jenjang kasasa nung ayur ta NSCN/GPRN sangdong ajangasa metetdaksü.

"Framework agreement" ya yimten ken o lir aser idakji ajemdaker Naga yimten ken o yakta latetsü. Iba telatetbajibo yimten kati mulungba nung latetsüba masü saka yimten anapronglai mulungba nung latetsü ta parnokisa metetdaksü. *(Maneni tapak 12 nung...)*

NSCN/GPRN teloki aitsür

Dimapur, June 01 (TYO) : KNF(N) teloki NSCN-IM telok nung Steering Committee member Wb.Khailun Haokip pua bener oa reshikangshir tepsetba mapaji kanga sashia aitsür ta NSCN-IM teloki metetdaksüogo.

KNF(N) teloki Khailun Haokip ya Kuki nungir yim ka tenüng agi Shijang nung lia pua bener ao, anungji pa pua bener oli NSCN teloki KNF(N) telok dang pa dak kecha tamajung meinyaki chioktsü metetdaksü aser ano Kuki aser Naga nungir lokti tentettemia paji taküm tajung chioktsü mepishia metetdaksü.

Ajisüaka, iba temepishiba olaji mangai KNF(N) teloki Khailun

Haokip reshikangshir tepsetba mapaji tapet mapa ajanga meyipa agütsütsü ta NSCN/GPRN telokisa metetdaksü.

Khailun Haokip ya 2008 küm NSCN/GPRN nung züngok aser kanga temulung lemteta inyakba Steering Committee Member ka liasü. Pa ama ka taküm samabaji temelen angutsü kanga tasak asütsü ta asür kinungirtem den mangyim jashi lemsatepba sangdong ka nung NSCN/GPRN teloki metetdaksü.

Pa tasüming nguteta bener arua asür kinungirtem nem agütsütetsüsa timtem jenti agia inyakba asoshi Naga aser Kuki nungir lokti tentettem dang kanga pelar ta parnokisa metetdaksü.

Bihar nung Class 12 topper police-i apu

Patna, June 2 (Agencies): Hokolbarnü Bihar School Examination Board (BSEB)-i Class 12 'topper' Ganesh Kumar takok agienba sülen police-i pa puogo.

Tanü kanga dang aritepa jatepba osangbener senden ka nung, Kishore-i "BSEB-i iba dak sendakba FIR ka benoktsü aser board-i Ganesh indang Class X Matriculation result-a sota ayur" ta metetdaksü.

Ganesh Kumar-i tatidang agütsütsü atema pa arishi küm miimbangtsü atema taila kulikakettem amshi. Ganesh indang shitakba arishi kümji 42 lir saka pai pa arishi küm 24 tain ta taila kulikaket agütsü, ta BSEB chairman Kishore-isa shisem.

Ganesh indang answer script repringertem pusema Kishore-isa ashiba agi, "pa indang answer

sheet ji kanga tajung liasü. Mongin nisung ka nema repringdaksüogo aser aibelen kecha maliasü ta paia kuli agütsüogo. Ajisüaka, onoki iba maparen bushisüngdang südar."

Taküm Bihar board tatidang indang result ji May 30, 2017 nü sangdong aser iba nung kaketsahir noklang nung shilem 65-i tamakok ngua liasü.

Ajisüaka, Ganesh-i Chhahhabib yimtsüng nung aliba Ramnandan Singh Jagdip Narayan High school nungi board tatidang agütsüba nung pai 82.6% takok ngua Class 12 nung mezüngbuba jenjang takok angu.

Result adokba sülen pa ajungbena samaba aser pai music & home science subject tem shimba ajanga ketdangsertemi pa dak temulung melemi bilem. *(Maneni tapak 12 nung...)*

Nagaland Angh-i NEC 66 buba Plenary nung o jembibi



New Delhi nung North East Council (NEC) indang 66 buba Plenary nung Nagaland Angh, P.B Acharya-i o jembidang agiba noksa ka angur.

Dimapur, June 2 (TYO): Nagaland Angh, P.B. Acharya-i May 29, 2017 nü North Eastern Council (NEC) 66 buba Plenary nung o jembibi.

1971 küm nungi North East Council ajanga northeast nung terenlok mapa dak sendakba onüktem benoka olemtepyonga arur, ta Acharya-i ashi.

Nagaland Angh-i lisopurtem sobaliba, kaket keno, yimyatsüya aser maitsü wazüka aser kümzüka ayutsü atema pai mapa inyakbatem indang osang lemsatep aser paisa NEC ya NAMASTE ta nungia melentsü asoshi tebilemba benok, ta PRO to Governor sangdong ka nung metetdaksü.

NAMASTE nung North Eastern State ajak indang tenüng densema lir, ta pai ashi.

Nagaland nung Medical College lapoktsü atema olen ka lemsatepdang, Acharya-i "State

sorkari Phriebagie, Kohima nung ali acre 40.251 alizükogo aser iba nung Administrative block, Academic, Hostel complex tem yanglutsü. Ministry of Health & FW-i District Hospital nungi New Medical College ajungkettsü atema sen crore 189.00 agütsütsü mulungogo" ta ashi.

"India sorkari iba mapa atema sen crore 52.50 agüja mapa inyak tenzüko aser sen crore 500 endoka yipden 500 aliba Mozüki den staff quarters aser osettsüttem alitsü atema NEC kübok tebilemba benokogo. Iba nung sen crore 233.76 ji yipden 500 aliba Teaching Hospital den staff quarters atema aser sen crore 266.24 ji osettsüttem atema lir," ta paisa metetdaksü.

Angh Acharya-i India sorkari Kolkata adena Dimapur nungi Delhi tashi Air India aser Indigo tayimtsütem senzütsü melaba atema pelaba metetdaksü aser

paia Air India dang Dimapur nungi Delhi tashi hopta nung anogo 6 senzüba nungi anogo 7 senzütsü mepishia ashi.

Paisa, Dimapur nungi Guwahati/Imphal tashi tayimtsü mali anungji NEC-i Ministry of Civil Aviation dang Guwahati-Imphal lenmang nung Dimapur dendaktsütsü atema astüngdang ta mepishia metetdaksü.

Northeast nung skill development indang jembidang, Acharya-i NEC dang Regional Plan den liromedema skill development indang maparen inyaktsü aser university ajak nung skill development sayatsü atema tebilemba ka lemsatep.

Mozü mamshii tsünisenbongtsü ajungkettsü atema NEC-i "Make in Northeast" brand ka tenzütsü aser iba atema Sikkim nungi ajizüka scheme tajung ka tenzütsü paisa metetdaksü. *(Maneni tapak 11 nung...)*

Yitachu-i Sü metsüba maparen ajungkettsü ayongzük



June 2, 2017 nü Medziphema, Dimapur nung ICAR-NCRM Jharnapani 27 buba Foundation Day nung Minister Yitachu den ICAR-NCRM staff aser tangartem külemi agiba noksa angur.

Dimapur, June 2 (TYO): School Education & SCERT Minister, Yitachu-i Nagaland nung Sü metsüba dak sendakba sentongtem atongtsü aser nisungtemi sü metsütsü ayongzük.

Mithun atema Indian Council of Agricultural Research-National Research Centre (ICAR-NRC) 27 buba

Foundation Day nung o jembidang, Yitachi-i ashiba agi, "Sü ya akhüm taket aser temeimtsü aketba shiruru ka lir aser iba shiruru ya Naga nungir den akhidang nungi sendakpepa lir. Iba shiruru ya kibong aser

yimtsüngtem tsüngda khurettem bentetsü atema amshi."

State Veterinary & Animal Husbandry Department kübok Sü metsütsü senotsü agüjaka Sü metsüba ajanga rongsenkettsüng tsütsü temelenshi kecha balaka mali. Iba ya sorkar aser shiruru metsürtem tsüngda tesentaktep tajung maliba ajanga lir, ta paisa ashi.

Sorkari shiruru metsür nem agütsüba incentives/subsidies ji Sü metsürtem masü saka tangari ang agizüka agir. ajisüaka, sü atema ICAR-NRC aliba ajanga asen state nung sü metsüba jenjang tajungba aser tuluba aküimtsü teimla lir. Institute,

sorkar aser sü metsürtem tsüngda tesentaktep tajung ali nungdang rongsenkettsüng tsütsü temelenshi adoktsü. ICAR-NRC Jharnapani-i shiruru metsür nem sentotsü teyari agütsüba dang masü saka osangtsüsang agütsüba den shiruru metsürtem yaritsüla, ta Minister-isa shisem.

Yitachu-isa, shiruru metsürtem dang ICAR-NRC Jharnapani ajanga senotsü teyari anguba atema dang masü saka teyari anguba nungi talila bendenloka reju ajungkettsü atema inyaktsüla, ta ayongzük. *(Maneni tapak 12 nung...)*

Dmr nung onlybafo.com online payment facility tenzükogo



June 02, 2017 nü sentong ka ayongzüka The Institute of Music Education, Duncan Basti Dimapur nung onlybafo indang online payment facility systems sangdongba sentong nung Managing Director, T.I.M.E(The institute for music education), Yanger, onlybafo.com kibur, Wati Imsong, Academy Director (The institute for music education), Yanpo aser Proprietor (Gethsemane Eatery), Putinungla nung tangokba noksa nung angur.

Dimapur, June 02 (TYO): Nagaland nung stores atema e-commerce & information website, www.onlybafo.com taküm March ita nung tenzükua liasü, aser tanü sentong ka ayongzüka The Institute of Music Education, Duncan Basti Dimapur nung parnok indang online payment facility systems sangdongogo.

Tang Dimapur aser Mokokchung na nungi Onlybafo

nung store 30 shi register süa lir, aser register asüba store shia peipei indang webpage lir aser peisasa ketdangsüa inyaker.

Item stores rongnung süoshi aser chiyungtsü nungi tenzükua musical instruments aser home décor store tem lir.

Iba ya ajangasa Dimapur nung restaurants aser hotel tem indang temetetsütem agütsür.

Iba website-i store trok indang online payment facility

sangdongogo aser maneni tarutsü nung store aika indanga sangdongtsü.

Store trokji- Little Store, P. P.33, Delicacies of Nagaland, Crescendo, Unique bakery (Mokokchung) aser Imchens Kitchen lir.

Onlybafo ajanga Dimapur aser Mokokchung nung deliver sütsür, aser maneni parnoki state nung tanga tesemtem aser India nunga deliver sütsüsü.

Kekhrie-i Nagaland Assembly by election nung tokteptsü

Kohima, June 02 (TYO): Lokti atema inyaker, shisashir aser kaketzülur, Kekhrie Yhome-i, pai 10-Northern Angami-1 Assembly Constituency menden by election nung tokteptsü, ta Brihostibarnü sangdongogo.

Iba menden ya MLA, Khriehu Liezietsu-i azüngtettsüogo.

May 24, 2017 nü Khriehu-i tebu aser tang teinyakdak Chief Minister, Dr. Shürhozelie Liezietsu atema lenmang lapokja azüngtettsü. Ajisiaka tang tashi nungbo Election Commission of India (ECI)-i by-election atema temtetba agiba sangdonga mali.

Yhome-i iba election nung tokteptsü sangdongogo, aser pai

yimtenren nung tain, Dr Liezietsu den tokteptsüsa akumtsü.

Yashi nikongdang Kohima nung osangbenertem den jembidang Yhome-i pai Independent candidate ama tokteptsü asü party kar ticket nungi tokteptsüar ibajibo memetdakttsü.

By-election nung tokteptsü atema kechiba nai temtetba agi ? ta asüngdangba langzüdang Yhome-i, yimtenren nung tangatetba agi anünga aser sen dang bilemba yimtenren, iba den külemi terenlok aser temelenshi nung tangatetba agi anünga anema tashikar lanuri dang inyaktetsü, ta ashi.

Teranabuba Nagaland

Legislative Assembly tashimaitba dak sendakba nung Yhome-i, nüburtemi maginüba tatalokbatem aika atalokogo, ta ashi.

Iba dak sendakba nung pai, tesüiba küm pezü tsüngda Nagaland nung Chief minister asem tashi liasü, aser pezübubajia arutsüsa tensa ka nung lir, ta ashi.

Yhome-isa, item ama tia maka tatalokbatem ajanga yimtenren, yimsüsüba aser tesünep kongshiogo, ta ashi.

"Asen teimla balala ajanga asen tarutsü yanglur. Ajak atema tarutsü tia junga yangertsü asoshi ajaki longjemer inyakttsüla," ta paisa ashi.



Tuli (Mokokchung), June 02, 2017: June 02, 2017 nü Government High School Kangtsüng-i Rajeshwari Karuma School (RKS) semdangba mapang tangokba noksa nung angur. GHS kaketshirtem aser tesayurtemi RKS kaketshirtem aser tesayurtem den shisa lemsatapa liasü. Iba sentong nung RKS-i GHS dang parnoki ajangshibatem indang lemsatetpa den külemi shisaliok inyakyim tajung ajanga lokti junga yangertsü atema nükjidong aliba lemsatapa liasü. RKS-isa GHS dang tanü putu shisaliok inyakyim indanga lemsatapa liasü.

Mkg nung World Environment Day amungtsü

Mokokchung, June 02 Legislative Assembly Speaker, (TYO): World Environment Day anogomung nungtem nung Department of Environment, Forest & Climate Change, Nagaland-i June 5, 2017 nü Town hall, Mokokchung nung "Connecting People to Nature" omen nung ajemdaker sentong ka ayongzüka amungtsü, ta Hokolbarnü ketdangsertem osang ka ajanga metetdakttsüogo.

Dr. Intiwapang Aier asütsü. Kasa sentong nung Environment, Forest and Climate Change Minister, Imkong L. Imchen, Parliamentary Secretary, Principal Chief Conservator of Forest aser tongtibang ketdangsertema adentsü.

Iba anogomung nungtem nung Mokokchung district kübok Village Council temi temtetba

kar bangzünga ayutsü, ta kasa osang ajangasa ashi.

District Level Recruitment Board written exam osang sangdongogo

Mokokchung, June 02 Stenographers atema typing test (TYO): Mokokchung Deputy Commissioner, Sushil Kumar Patel-i, May 27 nü agiba, District Level Recruitment Board candidate temji- LDA -candidate 96, Bench Assistant - candidate 8 aser Stenographers - candidate 7 lir.

Iba tatidang nung shimba candidate tem tenüngji Deputy Commissioner's office notice board nung malokja lir, ta kasa osang ajanga metetdakttsü.

LDA aser Bench Assistant atema computer test aser



Tzurangkong, June 02, 2017: NSF Tir menden nungi anisüngzüksang, Subenthung Kithan-i Hokolbarnü Tzurangkong nung NSF wako agizükba noksa nung angur. 27buba NSF General Conference ya Ao Students' Conference (AKM)-i ayonga (host) liasü aser iba senden June 02, 2017 aonung tembangogo. Iba senden ya kanga takok anguba NSF senden rongnung ka liasü ta züngshir.

Mkg DPDB senden June 6 nü amentsü

Mokokchung, June 02 Iba senden ya Chairman (TYO): Ita shia amenba DRDB, Mokokchung tasenba, Mokokchung District Planning and Development Board Merentoshi R. Jamir leniba nung amentsü.

Iba dak sendakba nung Board züngsem ajak dang mapang nung temelenshiji züngoka yur iba senden nung medema arua adentsü mepishia metetdakttsür, ta kasa sangdong nungsa shia lir.

Dmr nung World Environment Day amungtsü

Dimapur, June 02 (TYO): June 05, 2017 nü World Environment Day anogomung nungtem nung DMC-i ketdangsüa Swachh Bharat Mission kübok 'Door to Door collection at source for dry & wet waste' sentong tenzüktsü; Iba sentong ya DMC office nung nikongdang 1:00 ako nung akatsü aser Dimapur Swachh Bharat Ambassador,

Geoffrey Yaden-i iba mapatong tenzüktsüsü. Iba dak sendakba nung Chairman, Colony G.B tem aser Council züngsemtem den Municipal Jurisdiction kübok committee züngsem ajak iba sentong nung medema adentsü metetdakttsür, ta DMC Administrator, Moa Sangtem-i sangdong ka nung metetdakttsü.

Meghalaya, Ri-Bhoi district nung Congress office den gari asem rongdoktsü

Shillong, June 02 (Agencies): Meghalaya nung kaketshir lenir pongu apuba sülen anogo ishika lir Ri-Bhoi district nung mejangjaba nisung kari Congress office ka den gari asem rongdoktsü, ta Hokolbarnü

police-i metetdaksü. Yashi anepongi Congress office raksatsü aser office indang tongti kishi rongdoktsü. Yasüing iba district kübok Nongmynsong aser Umiam Lake tesem na nung petrol bomb

amshia osangkaket abenba gari ka, police requisition bus ka aser tanga gari ka rongdoktsü, ta parnokisa ashi. Ri-Bhoi district ketdangsertemi section 144 CrPC kübok nisung pongu dak tali madenshitsü atema

ozüing benoka lir. Ano state yimtiba, Shillong nungsa sepai tali meshisema sorkar kiojentem nükdakja security akangshiogo. Ri-Bhoi district nung railway project anema taoba ita railway construction ka amakba dak

sendakba nung Khasi Students Union lenir pongu pua lir. Railway yangluba ajanga bendangertem ozüing alema state telungi aita alitsü, ta bilemba kaketshir tenteti railway project ya anema nokdaker.



Nisung Million Aika Peladaksütsüsa Tashi Agütsür


GST

Nisungtemi agiba osettsüset/chiyungtsü aika nung JENJANG TAJEMBA KÜMDAKTSÜTSÜ ATEMA SARU KA

GST NUNG MADENER



GST NUNG SARU SHILEM 5% DANG



GST saru shilem 18 kübok osettsüset/chiyungtsü shilem 81 tashi
GST saru shilem 18 dak tema osettsüset/chiyungtsü shilem 19 dang

12% GST
Butter, ghee, molasses, castor oil, almonds, saffron, fruit juice, packed coconut water, apricots, cherries

18% GST
Petrol, diesel, kerosene, aviation turbine fuel, industrial intermediates, paints, varnishes, paper, glass, sugar, car-wash, soap and liquid soaps, iron & steel, leather, iron computer

28% GST
Consumer durables, cement, sherry, gum, natural ghee, perfume, stationery, radio-cd, fireworks, motorcycles





TIR YIMYIM YIMOBILEM (EDITORIAL)

DIMAPUR SATURDAY, JUNE 03, 2017

TAJUNGBA KÜMNÜBA

Alima nung ajaki tajungba kümner aser akümtsü nungdak. Item tajungba kümneritem rongnung Naga nung kaketshirtem ya dena lir. Ibayongji, tan Tzurangkong nung Naga nung "Tajungba kümnüba" omen nung Naga Students' Federation (NSF) lokti senden mongogo. Atangji, Nagaland nung balaka tajungba akümtsüba nungdakba telokji kaketshir teloktem ya lir. NSF ama kaketshir telongjem tentet ya Naga nung longjemer Naga nung merakat asoshi inyaktsü tentetba telok telongjem ka lir. Ibayongji, NSF teloki India map kubok state balala artsüdanga aliba ya magir saka Naga nung aliba tesem ajak amsema Naga nung longjema alitsü meranger. Iba jagi Naga nung Nagaland, Manipur, Assam, Arunachal Pradesh aser Myanmar nung aliba Naga nungertem ajak longjemer Naga lima ka yanglutsübaji NSF nukla aser nukjidong lir. Aji oda, tang India kubok aliba Nagaland map dang nungibo NSF meyong Nagaland map-sa tuluba lir. Ajisüaka, tanü tensa Naga nung yimten aser lokti jenjang reprangdangra, telemsa adokba aser tashi mait akümba anogotem agi Naga nung kangshiba mapang lir. NSF teloki Naga nung longjema alitsü jembia jembia NSF kubok liasüba Naga nung kin karbo medeni oadokogo. Ano külen, Naga nung longjemtsü jembia jembia Naga nung yimten nüchiso bushir teloktem rongnunga telemsa teimba-teimba akümba angur. Iba ama tensa ka nung Naga nung ajaki Naga nung tia aser tensa mapang tajungba küma aotsü asoshi inyaktsübaji kanga tongtibang kümogo. Ano, NSF asoshi balaka putu tensa dak apet teinyaktsü aika lir. Item rongnung NSF teloki Naga nung longjemtsü asoshi nukjidong yur tentetba ama Naga nung longjemtsü asoshi inyaktsübaji ajak dang nungi tongtibangba asütsü. NSF teloki angatetsüba kaji, Naga nung ajak ka küma longjemtsüba yabo political party ajanga inyakba agi makoktsü, anungji NSF telokbo party politics nungi pilaa alitsüla. Atangji, Naga nung lushi ajak yimten yimsüsüba ka kubok alitsü asoshi NSF nukla nung liaka, ibaji mapa küma inyaktsü asoshi NSF telok kijaia meinyaktetsü. Aji oda, Naga nung ajak longjema aliba sabang ka asoshi akok tashi NSF teloki inyaktsübajiang NSF mapa asütsüla. NSF asoshi Naga nung ajak longjema alitsü atema inyaktsübaji, alushi longjemtsüba dang nungibo, tangatetba nung Naga kin ajak ajurutepa shilem agitetsüsa lokti telongjem sabang ka tentetsü asoshi meranga inyaktsübajiang tongtibangba asütsü. Aji oda, Naga nung lushi ajak yimten ka kubok yur meputepi alitsü agibo, Naga nung lushi yimten balala kubok liaka Naga nung putepa lira, ibajiang Naga nung asoshi tajungba asütsü. Tang ya Naga nung yimten ka kubok longjema alitsü merangba maparentem ya reprangdangra, Naga nung melongjemtetbaji Naga nung longjema alitsü merangba ajanga melongjemteti akümer amai atalokba angur. Ibaji asenok ajak asoshi tebilemdangtsü tuluka lir. Iba dakji alaka tanü Naga nung tia tajungba akümtsü asoshi kaketshir telongjemi inyaktsüba tongtibang mapatem rongnung government nung ochimashi mapatem anema nokdaksüba mapa ya asütsü. Iba tangatetba nung koba government südir süaka kaketshirtem telongjem telokbo government kubok inyaker amai meinyaki tanü aser asung lima ajungtsü atema inyaker telok tongtibang ka ama bilema, kechi shitak aser ochi aji pusema inyaktsü aser kechi meshidak aser ochimashi lir, aji anema nokdaksübaji pei teinyaktsü mapa ta angateta inyaktsüla. Tanü tia majung kaji kaketshirtem kaketshirtem ajungtsü atema kangabo inyaka mangur aser ano külen government nung ochimashi aika liaka mangu aser mangashi ama toktsüba angur. Iba jagi kaketshirtem kanga akoksadagi. Tular aser takar karbo state government-i kaketshirtem asoshi temulung agüja meinyakba agi makoksatsüa akok, saka tilar aser sensaker kibongtem nungi adokba kaketshirtembo government nung alirtemi ochimashi tilaka inyakba agi school mezungtet anentsüsa akümtsü. Item nungdakji reprangteta NSF aser NSF kubok aliba kin shia nung kaketshir telongjemtemi inyakra, memeteti aser meteta Nagaland aser Naga nung tajungba kümer alitsü.

OLEMSABANG

NAGALAND YA KOBI MELIE RAKZUKRAKTEMER ASER AUER LIMA AKUMTSÜ

- I.Meren Lemtur, Tzüdikong

Tanü alima tejakleni karaa aoba putu ka nung asenok alir ta asenoki jembir, saka iba O ya asen Naga nung bang nungi adokka jembitsü asenok lima tia agi malang sür nung jembir. Kechiba ta süra, jembiba aser tanü Naga lima jenjang ya reprangdangra tangar tsungdang tejak metentetsüsa lir. Joko yimtak yimtsung nung alir alu ayimertemia alu meyimnür, hajira aoertema mapabo tilaba senbo teimba, chi aonbo tajungba asütsüla, kiburi shi ango mesotsüra kibur tu joko rangtong nung tua bener nungsen jembija tan sürbo par mapai maotsü ta asüba asen nübur lir. Ano Naga nung hajira walatemi inyaktsü mapa mangur ta jembir, saka tangar tsümartembo shir mapa nungang minyak nübu rakteper. Nie onok Tuli area nung danga asenok Naga nung mapa inyaka pei yari rongsen angudak kar shisemnür. Tuli area nung dang factory itemi lapoka lir : Tuli nung Tea factory ka lir, saw mill ana lir, Tzüdikong area nung Wameken nung lushi 10 mile nung tea factory ana, saw mill tilatem mezüangi tulu asem lir, plywood tapu ajak yanglutetba mill tuluka lir, stone crusher pezü tashi laboka lir, Ak farm lapoka lir aser iba dak alaka süngo lu, rubber lu ano farm balala zünger mezüngma Tsüngremer temoatsü asen Naga nung tangar dang memeshii pei lima nung rongsen peria angutsüsa lir. Iba dak alaka Nagaland tesem ajaklen small industry tapu aika laboka lir, saka item nung inyakerji reprangdangra tetsür tebur labour ajakji tsümartem dang angutsü. Ano iba dak alaka Nagaland nung RCC ki kwi yanglur ajak nung tsümar dang inyaker. Kechiba ta süra, Naga nungeri BABU aser MALIK dang anganüba kin, babu aser malik dang jarbo takitarutsü ajak agütsünüba kin. Talisa Tzüdikong 10 mile nung tsümar bongali nung nübu raktep dang tera menurbo nübuji mangur. saka Tuli aser Tzüdikong aser temeküt nung alir Naga nungertembo joko hajira aodaka mangur ta kidang moktepa kazüra karbo lir. Tangar tsümartembo hajira sen noklang 250 or 200ji anogo shia angur asü mangur aser tanübo mapa mangu ta shisabulu kecha makai alir. saka asenok Naga nung asoshiji mezüngbuba mapa tilaba asütsüla, chi basa mechiyungtsüla, süngu jemtsü mayung tajung asütsüla, kechiaser Naga nungeri joko Biscuit ajak agi lakadoker, anogo nung mapa ghonda 8 inyaktsüla saka anepdang menurung aotsü, moko Sali chia sensaksema menteptsü aser yakta sodir hajirabo tsümar anogo ana inyakba sen tu Naga nungerto kenü hajira meshia bener mapa nungi teshilangi yi ajemertem yi alia bener kidangi shilangtsü. Ano kidang aiür asangurba tubo mobile phone tajungba tu amer kidang mapa kecha meinyaki mungteper.

Iba dak alaka Nagaland Govt-i lanurtem tazünger mazüngeritem pei akok mapa inyaktetsüsa Industry ka danga nüburtem asoshi lapoktsütsü bilema mali. Anarongdena Tuli paper mill ka lapok nung tanü tashi tasüa masü, taküma makümer. Iba NPPC ano tanaben shia arua lapoktsü asoshi centre-ibo sen crore aika sanction asüba osang kaketem nung asenok ajaki züngogo, saka item sen ajak lisem nung tzü inoktsü ama samadoker koda kong, koda sür sama tebushir mali aser bushidangyonga kechiba mebushiteter ta süra Discovery aser Geographic-tv chanel nung Molongsongzütemi shiruru tulu ngusetar parnok jangratema tebok sünga chir anünga yutsüba shirong aser Hyna nung arua achiba medem Naga nung tulurtemi anir tilaba tashi agi tim mesüi ochi mashi rongsen agiba ajanga lir. Iba jagi tanü tashi Yihuda nungri nüktapangtatsür la dak taoner ka danga maliba ama tu tanü Nagaland govt-i iba NPPC asoshi kecha süoki ia mali. Oda temeimtsüka, NPPC nung inyaker workerstem ita terok tashi ita sen mangu timtem tulu agia lidagi. Anungji Naga nung iba tia ya yimsüsürtemi tenarong tena mebilemdangi yamai dang toktsüra, Naga limaji Khrista asoshi ta asüba melen rakzükraakter, auer, nisung tepseter lima akümtsü, aser asen kima romal ka danga kima ayutsü makoktsü, kobi melii süngu lu, rubber lu ano tanga farm nung kibur aodangbo auertemi bener oadoker alitsü mapang tonga arudagi, kechiaser Naga nungertemi sashia aginür, saka mapabo minyaknür, süra makara iba melenajibo auyatsüsa dang akümtsü.

Tatem nung item tia ajak ya koda sür yanglushitsü ta süra, mezüngbuba nung asen nüburtemi election ya pei kibong ajangzüktsü atema rongsen bushiba election ka masütsüla. Arung Khristan tajungtem, asenoki 2018 election yabo candidate-tem aser rongsen dak masü Yisu kangki dak rangloker asen lima tasen temerük ka küma yanglushitsü atema arogo aser lokti tentet balalai ayongzükba nung nübur ajaki tashi angaa anidaktsü bilema CLEAN ELECTION-ji atalokdaksüdi ta ayongzükter.

Iba Olemsabang nung lemsaba ken-o aser shisatsü ya iba ocet zülur-i bilema ken-o ama tazünger-i angateta agitsü mepishir

SÜNGDONGJI KECHI'AR SÜNGJANG AGI SAYUTSÜ.

- L.Kika Pongener, Aoyimkü, Dimapur.

Mathi-12:33-35. "Süngdong jungra iba süngjang ajungtsü; saka süngdong mejungra iba süngjangjia majungtsü; kechiaser süngdong kaji pei süngjangtem agi meteter". Nenok per chirtem, nenok mejungi yur nenoki koda tajung jembitetsü? Kechiaser kechi temulongjang nung sünga lir aji tebang agi jembir. Nisüng tajungi pei akaba tajung nungi oset tajung agiteter, saka nisüng tamajungi pei akaba tamajung nungi oset tamajung agiteter. Süngjanglijang süngdong ajunga nungbo süngjang tajung matanger, süngdong kar nungbo süngjang tarak keter, tarutsü yir, alongka tachitsü mejungi tangteter.

Asenoki iba süngdong telung nung lep-poka jungjunga reprangdangra, iba süngdong telung nungto tarak keter alitsü akok, süngdong tila asüba mapang nok agi leptur tarak keter indaktsüba, mesura ali telung nung tera ayangdak tarutsü mesen agi chir alitsü akok. Aji oda, ibala timtem jagi süngjangji tarak keter, tarutsü mesen yir, alongka tachitsü mejungi tangteter. Yamaji asen meimchir taküm libaliro nunga tsürabur taküm libaliro mejungra jala-jabaso tajung mesotetsü. Tsürabur ashi-auer süra chirnur semchisemnur-a ashi-auer sotetsü, tsürabur ashi-külak nisüng süra chirnur-a ashi-külak nisüng sotetsü, tsürabur nükdapangdar japojarir süra chirnur-a kusaji sotetsü, tsürabur ochi mashi tiyazür süra chirnur-a ochi mashir tiyazür sotetsü. Luke - 6:43-45. "Kechiaser süngdong tajung nung süngjang tamajung matanger, mesüra ano süngdong tamajung nung süngjang tajung matanger. Kechiaser süngdong shiaji pei süngjang agi meteter. Kechiaser ayidong nungi nisüngi mongu maonger, mesüra korishidong nungi parnoki tsükmenatsüjang maonger.

Tasendong nung tasenjang atangtsü aser takodong nung takojang atangtsü. Yisui tasen lai osangtajung kakettem nung ashibaji kangasa shidak lir "Süngdongji kechi'ar süngjang agi sayutsü" aji kanga dang shidak lir. Aser Yisui ashiba amaji nisüng temulongjang nung kechi lidir aji tebangi jembitsü, temulongjang telung nung tamajung agi sünga lira tamajung jembitsü, aser temulongjang telung nung tajung agi sünga lira tebangi tajung jembitsü, aji oda nisüng temulongjangji kechi'ar tebang nungi ola adokba jagi meteter. T.Ken-127:3. "Angang chirnurji Kibuba nungi anguba senmang lir; aser nu menden nungi tejangji pa senpet lir". Chirnur, jala-jabasotem ya asenoki züba-züba asenok nem odang moatsüba amai bilemer, saka item chirnur ya nu menden nungi Tsüngremi asen nem senmangtsü asoshi balaka asüngteta ashiteta renemer yokba senpet lir.

Nu mendenji asüngteta merükteta melira chirnurji tajung mesotetsü, kechiaser chirnurtem ya nu menden nungi Tsüngremi asenok asoshi senmangtsü senpet renemtsüba lir. Nu menden nungji tarak keta lira, tarutsü mesen lira chirnur tajung mesotetsü. T.Ken-128:1-4. "Nisüng shia shibai Kibuba tsüngen tsübur, shibai pa lenmang nung jajar, pa tepelatsü. Kechiyong ne ket agi züsentetba nai achitsü, na tepelatsü alitsü, aser nü den junga alitsü. Nü kidang kilung nung nü kinungtsüji tejang atangba tsükmenatsüdong ama alitsü, nü chirtem nü langbang meketa oliv süngdong ama alitsü. Ajiang Kibuba tsüngen tsübuba nisüngji yamaji alitsü".

Asenoki Tsüngrem tsüngen tsübua pa lenmang nung jaja-a pai mulongba ama taküm meshiteta asüngteta litetra, aser asen taküm ochishia indang-indanga litetra Tsüngremi asen nem senmangtsü chirnur oliv süngdong ama moatsütsü, aser chirnurtemi asen nem meyipa temoatsütem agütsütsü, parnoki asenok anepalua mesutsü, anisüngzüka lidaktsütsü, aser asenok iba temoatsü maongka nung arshia pelasete alitsü, ibaji Tsüngrem tsüngen tsübua alirtem asoshi temoatsü senmangji lir. Anungji asenoki asenok dak süngjang tajung atangtsüsa aser chirnur tajung jakzüksüsa, asen taküm Tsüngremi mulongba ama alitsü kanga tongtipang lir. Alima nisüngibo kechi shidir shiang, nisüng tenük agibo anguyonga manguyonga asenok takümü ochishishia indang-indanga lira, ashi-aya mesui kümdanga lira, ashi-kulaka tangar mashioktsüi lira, aser taküm libaliro asüngteta merukteta lira, asenoki inyakba mapa nung tangari temulong lemtetsüsa lira, asen dak nungi süngjang tajung atangtsü, chirnur semchisemnur tajung sotetsü. Ajiser chirnur semchisemnurtem temoatsü maongka aser parnok aküm nung asenok jangratema pelasete alima nung taso-a shizüka alitsü. T.Ken-37:3. "Kibuba dak amangang aser tajung inyakang; ajisura na ali nung taso shia alitsü". Asenoki mapa tajung inyakdi.

(Maneni taruba adok nung...)



May 31, 2017 nü Mangkolemba nung "World No Tobacco day" sentong agidang tangokba noksa angur. Iba sentong ya Mangkolemba Baptist Arogo social concern ministry ajanga acha-ayanga agi aser sentong asoshi Mr & Mrs. T. Sunep Walling'er kibong ajanga teyari tulu agütsüba den kinungtsü Dr. Arenla ajanga Temesepba chiyongtsü balala nungi pila alitsü tesayuba tajung agütsü. Iba sentong nung Mangkolemba nung aliba school balala nungi Class 8-12, kaketshir 200 shi arua tangazukba tulu angu, ta Social concern ministry Convenor, Amongla B Jamir-i sangdong ka nung metetdaksü.

ANOGO ABEN TSÜNGREM DEN

TSÜNGI O ASER TASHI. T.KEN 119:33-40

O Kibuba, nü Telatet ozüng kü dang sayuangma; aser aji ni tatem tashi bentshitsü. T. Ken 119:33

Tenüngsang ken züluri tangatet shisatsü asoshi sarasadem. "O Kibuba, Ne ozüng bentshitsü kü dang sayuangma." Asenoki tesangwa chir küma, aser ochiba nungi angazüksü mejangrar. Anungji asenok dang anogo shia sayutsü nungdaka akümer. Ni Kibuba shisa liokdaki aotsü, aser tashi angaba tanela agi pa tsüngdang mener angazüksü nungdaker." O Kibuba, kü dang sayuang."

Aser ken züluri pa mulungjang shidakbalen shitsütsü sarasadem. "Ne kulitem tsütsü kü mulungjang shijang." Aiben asenoki tai angatetter, tamajungji tentanger aser asenok tejangraba Tsüngremi mulungba anema alir. Ni Kibuba tsütsü nendakra kü terenlok koda karaa aotsü! Ni temenen tsütsü shir temeshiba lemmang nung jajatsü meranger. Anungji kü tebang ochi aser tobur tajung merüktetsü nungdaker. "Temeshiba asoshi shirnoki yaa tzüar, parnoki moa."

Anungji ken züluri temulungtetba takang agi sarasadem. "Ne ozüng lenmang nung ni odakjang." Pai tenokdangba ajak ajanga otetsü jakla (moral) takang alitsü sarasadem. Aser ibaji ni nungdaker.

SARASADEM:

O Kibuba, temulungtetba merang tongshi ama kümdakjang, aser tamajungba anogo nung nokdaktetsü yariang.

China nung Khristan okatsür kati reshikangshiba osang metetdaksü

Beijing, June 2 (Agencies): China nung Khristan okatsür kati pa tepuokdak reshikangba indang osang metetdaksü.

China sorkari meimchir temeten anema mapa inyakba indang osangji okatsür Li Heping-i ashi. 2015 küm pa human rights lawyer 250 den külemi apu.

Li aser tanga okatsürtem tepuokdak takdang tilala nung ayu aser parnok züka merenshiba den, junga memejangdaksü, memetetba mozütem chidaksü aser

electric shocks agütsü, ta China Aid ketdangser Bob Fu-i ashi.

China tir Xi Jinping-i sentong tamajungtem atongba aitsür, ta Fu-i metetdaksü.

"Xi-i Maoist inyakim tenzüik aser reshikangshiba maparen kanga mejungi inyaker. Iba ya alimai aitsütsüla. Xi-i China nung human rights lawyers aser rights advocates samatsütsü meranger" ta paisa ashi.

Taküm March ita Freedom House-i bushitetba nisung Khristan million 100 shi China nung reshikangshi tapu balala ajurur.

Jerusalem nung tekülem ki tasembuba yanglushitsü



Jerusalem, June 2 atsünga agi.

(Agencies): Israel nung International Department of The Temple Institute indang director Rabbi Richman-i Jerusalem nung Temple Mount yanglushitsü ta metetdaksü.

1967 küm Israeli Brigade Commander Col. Motta Gur-i Temple Mount atsünga agi. Iba tekülem ki agiba ya Yihuda nunger atema kanga tongtipang liasü kechiyong, iba tesem nung Solomon chubai mezüng Yihuda nunger tekülem ki yanglu.

Ajisüaka, Iba tekülemji raksatsüba sülen ano tanga tekülem ki ka yanglu saka ibajia Roman nungeri 70 AD nung

"Iba tekülem ki meyipa angubaji shinzüka aliba atalokba dang masü saka linük renloksü atema tetenzüker ka lir. Iba ya Kotak nungi temoatsü ka lir aser iba ajanga Tsüngrem temeim jungkai adoka sayur. Pai nangzükba ama inyaker ta kuli agütsür" ta Rabbi Richman-i ashi.

"Knesset (Israel parliament) nung teti Temple Mount nung Yihuda nunger sarsademtsü atema temeten indang jembir. Knesset nung züngsemtemi Holy Temple yanglushitsü indang jembir aser iba atema Institute-i blueprint ka renemogo" ta paisa shisem.

OLONG PAITEP # 4439

		1				2	3			
	4			5						
6						7				8
						9				
			10							
11									12	
		13								
					14					
15										

TIPIEN

- 2. Mengudaktsütsü merang - (5)
- 4. Mapa inyakdaktsü - (5)
- 7. T ___ ng - (3)
- 9. Ghonda 24 - (5)
- 10. Taa angutsü asoshi mapa inyak - (5)
- 11. Mapang matongdang - (5)
- 13. T ___ k - (3)
- 14. Senyur - (5)
- 15. Tzü jemnü - (5)

LANGTSÜNGLEN

- 1. Agitsü asoshi asüngdang - (5)
- 3. Taret - (6)
- 5. Ajurunüa bilem - (6)
- 6. Opang ka aküm - (7)
- 8. Densem / Atongtep - (7)
- 9. Tzünglu nungi kümzükbä - (6)
- 10. Ain alirtem - (6)
- 12. Yim ka nungi - (5)

OLONG PAITEP # 4438 TELANGZÜBA

TIPIEN :


- 1. Shitak, 5. Injung, 6. Koya,
- 7. Ajeb, 10. Artsü, 11. Kilen,
- 12. Tara, 15. Atep , 16. Arakzü,
- 17. Moatsü.

LANGTSÜNGLEN :

- 2. Inyaktet, 3. Kima, 4. Ano, 6. Konang,
- 8. Bilemtet, 9. Sentep, 13. Arem,
- 14. Ara.

Agüja aliba noksa nung oLongtem bushiang

- 1. Kees
- 2. Kees
- 3. Kees
- 4. Kees
- 5. Kees
- 6. Kees
- 7. Kees
- 8. Kees
- 9. Kees
- 10. Kees
- 11. Kees
- 12. Kees
- 13. Kees
- 14. Kees
- 15. Kees
- 16. Kees
- 17. Kees
- 18. Kees
- 19. Kees
- 20. Kees
- 21. Kees
- 22. Kees
- 23. Kees
- 24. Kees
- 25. Kees
- 26. Kees
- 27. Kees
- 28. Kees
- 29. Kees
- 30. Kees
- 31. Kees
- 32. Kees
- 33. Kees
- 34. Kees
- 35. Kees
- 36. Kees
- 37. Kees
- 38. Kees
- 39. Kees
- 40. Kees
- 41. Kees
- 42. Kees
- 43. Kees
- 44. Kees
- 45. Kees
- 46. Kees
- 47. Kees
- 48. Kees
- 49. Kees
- 50. Kees
- 51. Kees
- 52. Kees
- 53. Kees
- 54. Kees
- 55. Kees
- 56. Kees
- 57. Kees
- 58. Kees
- 59. Kees
- 60. Kees
- 61. Kees
- 62. Kees
- 63. Kees
- 64. Kees
- 65. Kees
- 66. Kees
- 67. Kees
- 68. Kees
- 69. Kees
- 70. Kees
- 71. Kees
- 72. Kees
- 73. Kees
- 74. Kees
- 75. Kees
- 76. Kees
- 77. Kees
- 78. Kees
- 79. Kees
- 80. Kees
- 81. Kees
- 82. Kees
- 83. Kees
- 84. Kees
- 85. Kees
- 86. Kees
- 87. Kees
- 88. Kees
- 89. Kees
- 90. Kees
- 91. Kees
- 92. Kees
- 93. Kees
- 94. Kees
- 95. Kees
- 96. Kees
- 97. Kees
- 98. Kees
- 99. Kees
- 100. Kees



TANÜBO NAI LANGZÜANG

Q: Economic Affairs Secretary tasen shiba shim?
 [A] Arvind Mayaram [B] Shaktikanta Das
 [C] Vijay Kelkar [D] Tapan Ray
 (Taruba adok nung onoki langzüsü)
YASHI ADOK TELANGZÜBA : Tobacco- a threat to development

Happy Birthday

Tenüng : Toshirenla Jamir
 Küm : June 3, 2005
 Class : 6
 School : Don Bosco Higher Sec School
 Talidak : Taxes colony, Lingrijen Dimapur
 Tsüngremi jala küm 12 tashi anir aru nung Tsüngrem nem tenüngsang agütsür, Ano maneni Tsüngremi jala nem arishi talang moajangma.
Temeim Oja, Oba, Otsü, Obu aser adianutem

Tepela Tasoba Anogo

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimyim bureau tem nung agüjang.

1. Tenüng : _____
 2. Tasoba anogo: _____
 3. Küm : _____ 4. Class : _____
 5. School : _____
 6. Talidak : _____
 7. Salem osang : _____

NAIA YA METETER MA

ALIMA NUNG TENLA KI TULUTIBA PONGU

- * St.Peter's Basilica, Vatican City
- * Basilica Of The National Shrine, Aparecida, Brazil
- * Seville Cathedral, Seville, Spain
- * Cathedral Of Saint John The Divine, New York, US
- * Milan Cathedral, Milan, Italy

SUDOKU # 3552					TELANGZÜBA # 3551				
1			3 5			2 9	9 4 8	2 7 6	1 3 5
3		6 8				1	7 5 1	4 3 9	6 2 8
				9		4	2 6 3	5 8 1	7 9 4
9 6				4		3	8 9 6	7 4 3	5 1 2
5				9		7 1	1 2 5	9 6 8	4 7 3
	3		5 2 1 9 8				3 7 4	1 5 2	8 6 9
		4		8			4 3 7	6 9 5	2 8 1
	1			5			5 8 2	3 1 7	9 4 6
8	9		7			5	6 1 9	8 2 4	3 5 7

OJANG LUTEP # 4047

SUNNGI :

KAAIIT :

TTEIMM :

ITSOUH :

AUBJUAR :

NGAPAM :

NGNU :

NGA :

GRÜNETSM :

ETBILEREMT :

OJANG LUTEP TELANGZÜBA # 4046

MAPABO MEINYAKER SAKA TANGARI INYAKBA DANG KENSHIA KAZÜBA YIMYATEM INDOKTSÜLA

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



Aries
21/3-19/4

Nür kinünger kar ajanga na nüma atangtsüsa mapangi bener arutsüsü. Telemtetba agitsü asoshi anogo tajung ka lir.



Taurus
20/4-20/5

Shisaliok nung nai langka kar ajangzüksü. Nikongdang 5:15 nungi 6:15 ako mapangji na asoshi tajungtiba asütsü.




Gemini
21/5-20/6

Tanü nür kidang kibong nung tesünep alitsü. Kinüngertem den amongba ajanga nü shi aser tanela naprong ajungmesotsü.



Cancer
21/6-22/7

Nür kinünger dak sendakba maparen kar nung ainlen senzüsüa akok. Taonung 7:30 nungi 8:30 ako mapangji na asoshi tajungtiba asütsü.



Leo
23/7-22/8

Nür medemertemi nü nem tetushi agütsüsü. Tanela jenjang asüngsashiba ajanga nai temolungjang nung tesünep angutsü.



Virgo
23/8-22/9

Tanü nai tetsükdaksü kar ajuruba ajangaji nai tarutsü nung maongka tajung angutsü. Nikongdang 6:15 nungi 7:30 ako mapangji na asoshi tajungtiba asütsü.



Libra
23/9-22/10

Tangari na nukshitsüsa nai mapa tajung ka inyaksü. Nai meimlai liaka nikongdang sempet ka angutsüa akok.



Scorpio
23/10-21/11

Nür kinünger aser medemertemi na nongita yaritsü. Aser parnok dang nungi na shisatsü agitsü merangang.



Sagittarius
22/11-21/12

Tanübo nai medemer aser kinüngertem den mongnüsü. Na anisüngzüksü asoshi anaogo tajung ka lir. Tanü anogo na pelatsüsa tensa aika ajurutsü südi.



Capricorn
22/12-19/1

Nü taküm nung tetsükdaksü aliba kar tanü bentettsü aser ibaji ajanga nai tesünep angutsü. Nü temolungtetba shisatsüji medemertemi nukshitsü.



Aquarius
20/1-18/2

Tanü nai medemer tasen kar yimtettsü südi. Anungji tembar tasen yimtettsü asoshi nai tama mera agitsü merangang.



Pisces
19/2-20/3

Mangatetep kar nai tanü benteta ayutsü merangang. Tanagr nem na matsüshidaktsüsü merangang aser nikongdang anisüngzüksü lenmang bushiang.

Anushka Sharma, SRK aser Katrina Kaif külemi shilem agitsü



Mumbai, June 02 (Agencies): Director Aanand L Rai indang taruba film nung Shah Rukh Khan 'Jab Tak Hai Jaan' film nung külemi shilem agir Katrina Kaif aser Anushka Sharma na den tanaben longjemogo.

Rai indang film tasenba nung Shah Rukh shilem agitsüba osang sangdongli nungi osang balala nung maneni agütsüdar. Iba küm tetenzükdang Katrina ibi film nung shilem agitsüba

jangjar liasü saka film nung ano tongti shilem nung tetsür ka inoksemtsüba atema tebilemdangba aika lemsatepa liasü. Iba film ya Red Chillies Entertainment aser Colour Yellow Productions-i produce asütsü.

Film yanglurtemi iba film nung shilem agitsü asoshi Anushka shimogo.


"Kü indang taruba film nung Shah Rukh aser Katrina na den külemi Anushka densemba

atema ni kanga jangra atemer. Mezüing anogo nungi Anushka-i la indang shilem den kanga junga sendaktepogo," ta Rai-i ashi.

Deobarnü Film City nung Rai indang film set kilem jirepa liasü. Iba lendong nung crew member ana terara yirua liasü. Film tangokba khen atema anena lir aser maneni iba hopta tatemlen nungi tangok tenzüksü.

Iba film ya 2018 christmas mapang sayatsü asoshi renema lir.

'Sgt. Pepper' kensep küm 50 ajungba tenüng nung The Beatles temaba jenjang adongtsü imlar



London, June 02 (Agencies): 'Sgt. Pepper's Lonely Hearts Club Band' kensep sayar küm 50 ajungba nungtem nung The Beatles telok ya UK nung tematiba jenjang tongtettsü imlar.

Paul McCartney, John Lennon, George Harrison aser Ringo Starr nungeri iba kensep ya 1967 nung saya-a UK top chart nung liasü aser küm 50 ajungba benjungmong nungtem nung iba kensep tanaben

sayashir. Iba kensep nung aliba ken ya kija, tarep CD aser 6 CD delux box set angutsü.

Iba kensep sayashiba nung ken temeyoktep inoka lir aser iba yongji iba kensep ya timba yoktettsü imlar. Tang tashi nung iba kensep 24,000 yoka lir aser Ed Sheeran indang tasembuba kensep 'Divide' alemyia temaba jenjang tongtettsü imlar. 'Sgt. Pepper's Lonely Hearts Club Band' kensep ya UK otsü nung 1960s mapang hopta 27 tashi temaba jenjang nung liasü.

Iba kensep ya The Beatles indang kensep ti buba lir aser iba kensep nung 'Lucy in the Sky with Diamonds' aser 'A Day in the Life' amala ken lir.



Los Angeles nung Keri Russell nem Hollywood Walk of Fame nung 'star' ka agütsüba sentong nung tangokba noksa nung angur.

TAN HOPTA ATEMA - KOMA SÜLA ?

Q Central government-i Nagaland nung nashi maleptsü aser shibelen mesüdaksütsü asoshi army nem tashi agütsü nunga koma süla ?

Olong 20 shi nung June 02, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsüsü.

MoS Telecommunication ajanga India Mobile Congress sayatsü



Noksa nung Manoj Sinha (abelen nungi pezübuba) den COAI indang Director General, Rajan S Mathews (abelen) aser ketdangsertem noksa nung angur.

New Delhi, June 02 (Agencies): Union Minister of State for Telecommunication, Manoj Sinha-i tanü India Mobile Congress 2017 (IMC 2017) sayatsüogo aser ibai lintük nung Telecom, Internet & Mobility ecosystem den ICT, App yanglur, innovator aser start-ups purtem asoshi sapang tuluba aser mezüngbuba asütsü.

"India Mobile Congress ya telecom industry nung sentong tulutiba asütsü aser iba ajanga industry nung ketdangser aser sorkar atema sapang ka yanglutsütsü," ta iba sendong aser

logo sayaba mapang Sinha-i ashi. COAI, K aser D Communications Limited dang iba sentong ayongba asoshi pelaba osang ka Minister-i ashi aser akok tashi yaritsü shisem. Iba sentong ajanga Ato Kelonser indang digital India nukla asoshi jenjang tajung yanglutsür.

"COAI den külemi K aser D Communication Limited ajanga iba sentong 'world class environment' jenjang nung inyakdaksütsü asoshi inyakteptar. India Mobile Congress ya India nung kanga

tongtipang sentong ka südaksütsü," ta iba sentong nung COAI indang Director General, Rajan S. Mathews-i jembidang ashi.

India Mobile Congress ya 2017, September 27 nungi 29 tashi New Delhi nung aliba Pragati Maidan nung amongtsü aser iba sentong nung sorkar, Telecom Service Providers (TSPs), handset yanglur, Internet giants, ISPs, Global technology ketdangser, AI & VR company tem, Mobility lenir, Academia, Start-ups aser App yanglurtemi shilem agitsü.

3000mAh battery aliba Moto Z2 Play sayaogo

June 02, 2017 (Agencies): Motorola ajanga sen \$499 (India nunger sen 32,200) jenjang Moto Z2 Play sayaogo. Iba smartphone ya Moto Z den mesüktepa lir.

Saka Lenovo indang Motorola ya India nung sayatsü indang osang kicha agüja mali.


Moto Z2 Play nung Android 7 Nougat lir aser iba phone display ya 5.5-inch fill-HD Super AMOLED den Corning Gorilla Glass 3 lir.

Motorola indang phone tasenba camera ya 12-megapixel den 1.4-micron pixel sensor, f/1.7 aperture, colour correlated temperature (CCT) dual-LED flash, laser aser dual autofocus lens keta lir.

Moto Z2 Play indang battery tashi ya 3,000mAh lir aser Moto Z Play nung aliba battery dang 510mAh agi tajemba lir. Iba smartphone nung USB Type-C aser Turbo charge amshiteter. Lenovo ajanga ashiba agi, minute 30 nung battery shilem 50 tashi charge asütsü akoker.

Moto Z2 Play indang 'home button' nung fingerprint scanner keta lir aser phone nung tzi mamongtsü atema nano-coating inokja lir.

Maneni Moto Mods tasen




pezü yanglua lir. JBL SoundBoost 2 aser TurboPower Pack, koba nung 3490mAh tashi lir.

JBL SoundBoost 2 aser TurboPower Pack jenjang sen \$79. Iba phone atema 'wireless charger' sen \$39 agi angur aser Moto GamePad-a sen \$79 agi angur.

Motorola indang Moto Z2 Play ya tabu ana nung angur, mezüng tabu ya 3GB RAM aser internal storage 32GB aser tanabuba tabu ya 4GB RAM den 64GB ROM lir.

Iba samrtphone ya 'Lunar Grey' aser 'Fine Gold' sentüsü nung angutsü.

IIFA 2017 awards New York nung amungtsü



Mumbai, June 02 : Mumbai nung Brehostibar aonung 18buba International Indian Film Academy (IIFA) indang osangbener den Bollywood actors Alia Bhatt, Salman Khan aser Katrina Kaif nunger-i jembiba mapang tangokba noksa nung angur.

Mumbai, June 02 (Agencies): Taküm July ita New York nung International Indian Film Academy (IIFA) Awards alitsü ta osang metetdaksüogo.

18buba IIFA Award sentong ji film yanglur Karan Johar menden ser agitsü aser iba Awards atema pa indang film "Ae Dil Hai Mushkil" züngsema lir.

'Ae Dil Hai Mushkil' film ji telemsa 8 nung züngsema lir aser iba sülen "M.S. Dhoni: The Untold Story" telemsa 7 nung züngsema lir.

IIFA Weekend & Awards ji July 13 nungi 15 tashi agitsü aser iba sentong nung Indian film, kenten, tsüngsang aser fashion

benjungtsü. Iba dak sendakba nung Bollywood actor tem- Salman Khan, Katrina Kaif aser Alia Bhatt nungeri Mumbai nung osangbener senden ka nung osang kar metetdaksü aser parnokisa yimti pungu- New York, London, Dubai, Chicago aser Houston nung live video conference liasü.

IIFA Rocks 2017 nung A.R. Rahman, Diljit Dosanjh, Benny Dayal, Javed Ali, Neeti Mohan, Jonita Gandhi aser Haricharan Seshadri nungertemi kentenba shilem agitsü.

IIFA Rocks nung Riteish Deshmukh aser Manish Paul nati len anitsü aser iba sentong ya

sempet agütsüba anogo matongdang agitsü.

Sentongji Metlife Stadium nungi Colors channel nung live sayatsü aser Salman, Katrina o Alia nunger dak alia Shahid Kapoor, Sushant Singh Rajput aser Kriti Sanon nungeria shilem agitsü sentong lir.

International Indian Film Academy (IIFA) Awards ji Wizcraft International Entertainment ajanga ayongzüker aser parnoki New York nung iba dak sendakba jili sentong ka ayongzüka agiogo.

Tang agi tanabenbuba IIFA ya United States nung agitsü. 2014 nunga iba sentong ya Tampa Bay nung ayongzüka agia liasü.

India nung Nokia 3, 5, aser 6 Android smartphone June 13 nung sayatsü

New Delhi, June 02 (Agencies): Talangka nungi yongya aliba Nokia indang Android smartphone - Nokia 3, Nokia 5 aser Nokia 6 ya India nung June 13 nung sayatsü osang sangdongogo.

Nokia 3, 5 aser 6 den külemi Nokia 3310 yanglushir 2017, February ita Barcelona nung Mobile World Congress 2017 (MWC) nung saya liasü.

Nokia 3310 ya India nung May 18 nung saya saka Nokia indang Android smartphone India-i arutsü osang kicha meliasü.

Nokia 3 ya sen 10,000 tekübok agi angutsü imlar. Nokia 5 ya sen 15,000 tekübok aser Nokia 6 ya sen 18,000 dang tekübokba nung angutsü imlar.

HMD Global company ajanga alima nung Nokia indang phone yanglua ayoktsü aser ajungkettsü temeden lir aser China nunger indang phone timba aliba shishilembadak tokteptsü asoshi nüburtem nem saklok daksütsüsa jenjang talangba agi Nokia Android smartphone ya ayoktsü imlar.

Nokia 6 smartphone indang display ya 5.5-inch Full HD 2.5D Gorilla Glass lir. Iba phone indang operating system ya Android Nougat, Qualcomm Snapdragon 430 SoC lir. Nokia 6 indang battery tashi ya 3,000mAh, RAM 4GB aser internal storage ya 64GB alitsü.

Nokia 6 indang tesülen



camera ya 16-megapixel aser f/2.0 aperture, tejaklen aliba camera ya 8-megapixel den f/2.0 aperture aser audio ya Dolby Atmos alitsü.

Nokia 5 smartphone indang display ya 5.2-inch (720 x 1280) lir aser operating system ya Android Nougat alitsü. Iba phone nung Qualcomm Snapdragon 430 SoC lir. Maneni iba smartphone indang RAM ya 2GB aser internal storage ya 16GB alitsü. Nokia 5 indang tesülen camera ya 13-megapixel aser tejaklen camera ya 8-megapixel lir aser phone indang battery tashi ya 3,000mAh asütsü.

Nokia 3 indang processor ya MediaTek aser tesülen camera ya 8-megapixel lir. Iba phone indang display ya 5-inch aser battery tashi ya 2,650mAh keta lir. Nokia 3 nung tanüngba osettem ya Nokia 5 handset nung ama keta lir.



New Delhi, June 02, 2017: Hokolbarnü New Delhi nung MSME-Samsung Technical School tezüngzüktep agiba sentong nung Micro, Small and Medium Enterprises Union Minister, Kalraj Mishra, Food Processing Industries Union Minister, Harsimrat Kaur Badal aser Samsung Electronics India Pvt. Ltd. Tir, Hyun Chil Hong nung tangokba noksa nung angur.

Astana summit nung India SCO züngsem akümtsü: China

Delhi/Beijing, June 02

(Agencies): Taruba hopta Kazakhstan nung Shanghai Cooperation Organisation (SCO) indang yimtenren aser security senden nung India aser Pakistan nata iba telok nung züngsem akümtsü, ta China-i osang ka ajanga metetdaksü.

China Foreign Ministry otongdar, Hua Chunying-i, iba telok nung India aser Pakistan na züngsem akümba ajanga linük ana tesendakatep tajungba akümtsü imlar, ta ashi.

"India aser Pakistan nati SCO telatetbatem beshitsü aser kiyonger tajung ama alitsü imlar, iba den külemi parnoki SCO tanela nung tesendakatep tajungba küma SCO nung terenlok alitsü imlar," ta Hua-i Beijing nung osangbenertem dang metetdaksü.

Laisa, linük ana iba telok nung adentsü atema mapang talangka agiogo, aser tesüsa China-i agizükogoo; June 8-9 anogotem nung Kazakhstan yimtiba, Astana nung SCO senden amendang linük ana ya züngsem akümtsü, ta metetdaksü.

Iba senden nung China Tir, Xi Jinping aser Russia Tir, Vladimir Putin na dak alia India Ato kilonser, Narendra Modi aser Pakistan Ato kilonser, Nawaz Sharif nata adentsü imlar, ta osang angazüker.

Iba senden alidang Modi aser Sharif nata ajurutepa jurila senden ka amentsüa akok.

"SCO züngsem linüktemi

linük ana atema tezüngzüktep inyakyim aritepa inyakdar, aser maparen ajak junga odar," ta Hua-i ashi.

"Astana senden nung India aser Pakistan na züngsem akümtsü ta onoki imlar. Astana senden nung linük ana iba telok nung adenba inyakyim tembanga inyaksü imlar," ta lai osangbenertem dang ashi.

SCO ya 1996 küm Shanghai nung tenteta liasü. Tang iba telok nung züngsemtemji China, Kazakhstan, Kyrgyzstan, Russia, Tajikistan aser Uzbekistan linüktem lir, aser iba teloki Central Asia nung rangloker security group ka ama inyaker.

Tang tashi nungbo India, Pakistan, Afghanistan, Belarus, Iran aser Mongolia linüktem ya SCO observer tem dang lir.

2015 küm Russia, Ufa nung SCO senden alidang India aser Pakistan nata iba telok nung agizüksü asoshi maparen tenzüksü lemteta liasü.

Iba telok nung züngsem akümtsü atema yaküm Takshent nung SCO senden alidang linük anapronglai Memorandum of Obligations (MoU) tezüngzüktep agia liasü.

Küm ishika tejaklen nungi tenzükä Russia-i India-a iba telok nung züngsem akümtsü atema nungita arur aser China-i Pakistan nungita arur.

India aser Pakistan na tsüngda, aser China o India na tsüngda tensa mejungi aliba mapang ka nung linük ana iba

telok nung züngsem akümtsü.

Iba ya, China, India aser Pak lenirtem ajurutsü atema SCO ajanga sabang ka lapoktsür lir.

India aser China linük na BRICS, (Brazil, Russia, India, China aser South Africa) nung züngsem lir. 9buba BRICS senden taküm September ita China yimti, Xiamen nung ayonga akatsü.

SCO-i Central Asia nung, talisa Xinjiang, China'er Uygur Muslim province nung kiralongrartem, talisa East Turkistan Islamic Movement (ETIM) anema raratsü nükjiong nung rangloker inyaker.

"Linük ana tezüngzüktep agitsü atema SCO-i maparen kanga ilunga inyakdar. SCO tentetba sülen tang mezüng iba telok ulushir. Iba ya regional tentet ka akümtsü aser nütsüng shilem tuluba ka ayimjemtsü," ta Hua-i ashi.

Alima nung nütsüng timtiba aliba linük anaji China aser India na lir, aser ibaji ajanga iba teloki nütsüng shilem tulubaka ayimjemtsü.

China-i aniba SCO telok nung züngsem trok linüktemi Central Asia nung security dak sendakba onüktem nung rangloker inyaker.

SCO ya tongtibangsüa züngsem linüktem indang mitkartem tsüngda amalitepa inyaksü atema lir. Iba nungji intelligence osang lemsateptsü aser Central Asia nung amalitepa kiralongra anema raratsü asoshi lir.

India-i Prithvi-II Missile takok ngua tendangogo

Balasure, June 02

(Agencies): Hokolbarnü Odishia nung India-i linük nung yangluba nuclear-capable Prithvi-II missile takok ngua tendangogo.

Kilometer 350 tashi khadoktetba surface-to-surface missile ji tanep 9:50 ako meta Balasure anasa Integrated Test Range (ITR) Chandipur, launch complex-3 nungi tendang, ta ketdangsertem osang ka ajanga metetdaksü.

Iba missile takok ngua tendangogo aser iba mission nükjiongtem atalokogo, ta ketdangsertemisa ashi.

Prithvi-II missile yagi warheads seret 500 nungi seret 1,000 tashi bentetsü, aser iba missile nung liquid propulsion gol ana keta lir. Iba missile-i inertial guidance system den manoeuvring trajectory amshia mezüng-

mezünga akar.

Iba missile tenzükba maparen ya strategic force command (SFC)-i ketdangsüa inyak aser Defence Research and Development Organisation (DRDO) nungi scientist temi achaaayanga tendangogo, ta DRDO scientist kati ashi.

"Missile khadokbaji Odisha tzüymküm nung aliba DRDO radars, electro-optical tracking systems aser telemetry stations ajanga track süa liasü," ta kasa osang ajanga ashi.

2016 küm November 21 nüa kasa base nungi Prithvi-II missiles ana takok ngua tendanga liasü.

2003 küm Indian armed forces nung inoksemba metre 9 talang Prithvi-II ya Integrated Guided Missile Development Programme kübok DRDO-i yangluba mezüngbuba missile lir.

Bihar nung yi litre 60,000 raksaa intok



Rohtas (Bihar), June 02, 2017: Hokolbarnü Bihar kübok Rohtas district nung Bihar police-i roller gari amshia yi pongdang aika raksaa intokba noksa nung angur.

Rohtas, June 02

(Agencies): Hokolbarnü Bihar police-i Rohtas district nung yi litre 60,000 keta aliba yi pongdang aika raksaa intokogo.

Bihar nung yi rizünga yua alibatem May 31 tashi nung raksaa intoktsü atema tetuyuba agüja liasü, ajisüaka tan ita tetenzüklen Supreme Court-i iba atemaji July 31 tashi mapang atsülangtsüba ajanga state nung yi yanglur kiburtem temelungjang anisüngzük nguogo.

Justice Arjan Kumar Sikri-i aniba Supreme Court, vacation bench kati May 31 tashi mapang latetja alibaji July 31 tashi mapang atsülangtsü.

Supreme Court nung senior lawyer, Kapil Sibal-i Bihar Keshav Mohan tenüng nung benokba onüktem court-i angadanga liasü.

Mohan-i Supreme Court dang, state nung ozüng alema inyakba mapatem jenti beshidar, aser

parnok nem mapang matsülangtsütsüla, ta ashi.

Iba sülen yi manufacture asürtem aikati Supreme Court dang state nung rizünga aliba yi raksaa intoktsü mapangji atsülangtsütsü mepishia liasü.

Taküm January ita nung Bihar sorkari Patna High Court nung yi nokdangba anema ozüng yangluba ken oji Supreme Court-i belentsü mepishia liasü.

Tamalen yi company temi yi nokdangba anema Patna High Court nung ken o benoka liasü.

Yi nokdangba ozüng nungji-yi ayoktsü aser ajemtsü memelar, aser iba nungji Indian-Made Foreign Liquor (IMFL) aser state nung yangluba yitem densema lir.

Yaküm Chief Minister, Nitish Kumar-i aniba Bihar sorkari Bihar Prohibition and Excise Act, 2016 tasen benoka liasü, aser iba Act ajanga state nung yi tapu ajak ayoktsü mesüra ajemtsü memelar.



New Delhi, June 02, 2017: Hokolbarnü New Delhi nung Haryana Chief Minister, Manohar Lal Khattar-i Minister of State for Culture and Tourism (Independent Charge), Dr. Mahesh Sharma ajurua senden amenba noksa nung angur.



Berlin, June 2 : Bellevu Castle, Berlin nung Germany tir, Frank-Walter Steinmeier (abelen nungi tanabuba), Germany Chancellor, Angela Merkel (abelen) Family Minister menden doktsü, Manuela Schwesig (achichi) aser Family Minister tasen shimba, Katarina Barley nungertem menden melentepba sentong nung tangokba noksa nung angur.

Bangladesh police-i raradang amshiba oset aika ngutet

Dhaka, June 02 (Agencies): Dhaka anasa Narayanganj yimti nung aliba Rupganj nung nisung-i yangluba awatsüing ka nungi police temi rocket launcher ana aser Chinese-made machine gun 62 densema raradang amshiba oset aika Hokulbarnü ngutet. Osang kar angazükba sülen police aser fire service gari anishirtemi yariteba iba nisungi yangluba awatsüing nungi Chinese-made sub-machine gun 62, rocket launcher ana, hand grenade 42, fire pistol tem aser injang aika poly bag tem

nung alepa yua aliba ngutet aser police temi iba ken o nung asüingdangyatsü atema nisung asen pua lir. Parnoki tzü aoba lenmang nunga bushidang raraba osettem ya tzü telung nungi aika ngutet. "Item prangpong aser injangtem ya linük nung timtem agütsütsü asoshi iba tesem nung ya benden," ta Inspector General, Shahidul Haque-i ashi. Saka tang tashi nung item raradang amshiba oset ngutetba ken o nung telok mesüra

kiralongrar shinga tenünga police temi agüja mali. Bangladesh indang police headquarter nungi district ajunga nung police tanishirtem dangi telungpur 5,000-shi linük nung lir südi ta temolung melemtetba osang brokshia lir aser iba ajanga police tem tali saksalema kümogo. Taküm March ita nunga Bangladesh police temi telungpur anema mita bushiba mapang telungpur südi ta temolung melemtetba nisung 17 tepset.

Telok ka kijai ashiba agi Paris tenangzüktep memelenshitettsü: UN

United Nations, June 2 (Agencies): US tir Donald Trump-i Paris climate tenangzüktep nung temelenshi kar asütsü sangdongba nung United Nations indang Framework Convention on Climate Change-i memulunger. "Paris Climate Agreement ya linük 190 temai sign asüba otsüsütsü tenangzüktep ka lir aser linük kati ashiba nung ajemdaker dangbo memelenshitettsü" ta Framework Convention on Climate Change-i metetdaksü.

UNFCCC kettangsuba kübok Paris agreement ya agi aser parnoki ashiba agi, US tir Donald Trump-i Paris Climate Change Agreement nung par linük madentsü sangoktsüba atema sasa bilemer.

White House nung aliba Rose Garden nung Trump-i, par sorkari Paris Accord nung temelenshi kar asütsü mesüra United States atema tim ta asüba telatetbaba tasentem agitsü, ta metetdaksü.

"Paris Agreement nung linük 194-i sign süogo aser linük 147-

i mulunga agizükogo. Anungji, telok ka kijai ashiba nung ajemdaker temelenshi mesütettsü" ta UNFCCC Secretariat-i sangdong ka nung metetdaksü.

Iba onük atema United States sorkar den jembishinütsü mulunga lir, ta parnokisa ashi.

"Paris Agreement-i alima nung rongsenkettsting aser takümtem jenjang tajungba kümduksü atema tamendakdak ka yanglur. Iba ajanga alima tali azükarutsü, lendong nungi jenbua alitsü aser wazüka ayutsü. Linük ajaki mulunga tenangzüktep agi aser iba nung shishilemar, yimitem, linük aser sensotemi pusema nungiter" ta NFCCC-isa metetdaksü.

December 2015 nung UN Framework Convention on Climate Change (UNFCCC)-i kettangsuba agiba COP21 mungdang nung Paris tenangzüktep agi.

Iba tenangzüktep ajanga linüktemi alima nung climate change aser global temperature 2 degrees Celsius tashi ajema kümduksütsü atema alizüing yua lir.



St. Petersburg, June 2 : Hokulbarnü St. Petersburg, Russia nung India Ato Kelonser Narendra Modi-i Institute of Oriental Manuscripts semdangba mapang tangokba noksa nung angur.

Resorts World Manila lendong nungi tasü mang 36 ngutet

Manila, June 02 (Agencies): Philippine yimtiba Manila nung aliba casino aser hotel complex nung mejangjaba nisung kati Hokulbar anepdang injang khashiba tesem nungi nisung 36 tasü mang ngutetogo.

Asür rongnung timbaka iba mejangjaba nisung-i casino table tem nung mi senloktsüba mokozü ajanga tangu mesashiteti asü, ta kettangser temi osangbener dang ashi.

Resorts World Manila nung aliba casino nung mejangjaba nisung ka yagi Hokulbar anepdang yakta injang khaloktsü tenük.

Kettangsertemi mezüingbo iba lendong nung nisung asür kata mali, ta ashi saka iba lendong agütsüsang ya asüba sülen ki ajunga mita bushiba mapang tasü mang 36 ya ngutet.

Islamic State (IS) temi iba lendong ya agütsü, ta tenünga agiaka, iba lendong ya rakzükraktemer mapa lir, ta kettangsertemi ashir.

IS temi iba lendong adalokdaksü, ta tenünga agiba osang ya Telegram ajanga ashi saka iba dak alaka tejangja osang balaka shia mali.

Iba mejangjaba nisung ya casino yagi ayatirm ajangli ait

aser assault rifle prangpong nungi injang akha tenük.

Pai injang ya nisung dak masü saka tazüingla nung akha, aser iba ajanga nisung aoksa aser tsübutep, ta Southern Police District Superintendent, Tomas Apolinario-i osangbener dang ashi.

"Iba lendong nung nisung kar yiru aser kar asü, saka parnok dak injang agi kongshiba zübu mali," ta pai-sa ashi.

Iba mejangjaba nisung-i 'gambling' asayaba table nung mi senoktsü aser pai bona aliba juli nung sen million \$113 jenjang 'gambling chips' tem inok. Pai iba juli doktsür hotel aliba ki telungi jena ao.

"Pa yipden ka nung mejang aser petrol inloker blanket temelem ka agi pasasa pa longbang aser mi tsükloksü," ta National Police nung tekolakba, Roland Dela Rosa-i ashi.

Resorts World Manila ajanga sangdongba agi, iba nisung ya pasasa pa dak mi senloktsü aser pai-sa pa dak injang khaloktsü.

Police temi CCTV indang noksa prokshiba nung iba nisung ya süoshi tanak sübur, prangpong bener lir.

Iba lendong nung yirur alir nisung 50 dak tali mozüki nung anepaluba mapang lir.

Na MSME msmedatabank.in nung tenünga züluoktsü ya compulsory-a ta nai meteter ma MSME DATABANK nung register asütsü minute 5 dang agir asü?

Iba ya na atema Govt. of India indang Gazette notification no. 529 Part-ii, Sec3-Sub-section (i) dated 29 July 2016 nung agüja lir

MSME indang scheme balala indang teyari agitsü asoshi registration agitsü nüngdaker

Public procurement policy nungia na teyari angutsü

Sentong tasentem:

- Credit Guarantee tatakük crore ka nungi crore ana kümstür.
- Mezüingbuba Credit Guarantee ya Non Banking Financial Company tem nem tashi agütsüteter aser iba ajanga Micro & Small Enterprises atema loan agütsür.
- Micro & Small Enterprises atema working capital loan tem shilem 20 nungi project digital component annual turnover shilem 30 timba kümduksü.

Tejangja metettsü asoshi tongtepratapang: [Email: support@msmedatabank.in](mailto:support@msmedatabank.in)

Mapa mongui aliba lanurtem PMEGP nungi teyari agitettsü

- Shidisen mamshiba ajanga nüsasa na ajangzüktsü
- Khadi & Coir osettem amshiang

Government of India
Ministry of Micro, Small & Medium Enterprises

Nagaland Angh-i...

(TAPAK 1 NUNGI...)

Act East Policy nung NEC indang Regional Plan nung flight connectivity dang shia lir saka India aser South East Asian linüktem tsingda air connectivity den külemi road & rail connection alitsüla, ta Acharya-isa metetdaksü.

India-i nüjiso anguba sülen küm ka lir, 1948 Summer Olympics nung Dr. T. Ao captain sür India National football team-i asaya aser India nung telok atema pai linük wako amer shilem agi. NEC ketdangsüba kübok 2010 nungi NE State tem nung "Dr. T. Ao Memorial Football Tournament" asayayonga arudar, iba atema Nagaland-i NEC indang Regional Plan kübok Dr. T. Ao Football Academy lapoktsü atema asüngdangogo, ta paisa shisem.

Nagaland nung sobaliba takar asübayong sübosolemtsü aser teka agi yangluba osettem aika lir aser South-east Asian linüktem dangi readymade apparel, handlooms, handicrafts & textile products shishilembatetsü. Anungji, NEC iba dak sendakba nung temlung agüja NE state tem nung traditional industry ajungkettsüla. Maneni, Education, Health, Agriculture Sector amala nung Private Public Partnership ajungmesotsüla.

Nagaland nung Medical College tasen atema Medical Science University of Mangalore, Nite University-i Private Public Partnership nung yariteptsü nangzükogo aser Vice Chancellor, Registrar aser tanga tongti ketdangsertemi Nagaland semdangogo, ta Angh-isa shisem.

E-TENDER NOTICE NO. LMG/Engg/10 of 2017 (Item No. 1 & 2)
DTB-30-05-2017

India nung Tir tenung nung tsunglanglen agüja aliba mapatem atema E-Tendering System ajanga work tenders meshir.

SN 01. Brief Description of Item : At Dimapur-Provision of new foot over Bridge (FOB) connection to PF No.1 & 2/3 at Dimapur station. Tender Value : ₹ 3,51,26,10/-; Earnest Money: ₹ 3,25,640/-; Cost of tender documents: ₹ 10,000/-; Completion period of work : 08 Months.

SN 02. Brief Description of Item : At Lumding-Provision of 2 (two) nos. Escalator on PF No. 1 and on circulating area (Near Vivekananda Railway Station) and other related works. Tender Value : ₹ 75,09,471/-; Earnest Money: ₹ 1,50,190/-; Cost of tender documents: ₹ 5,000/-; Completion period of work : 06 Months.

Date & time of closing of above e-tender : 15:00 hours of 05-07-2017.

Date & time of opening of above e-tender : 15:00 hours of 09-07-2017.

Temetetsü: <http://www.ireps.gov.in> website nung 0.5.07.2017 nikongdang 3:00 akok tashi nung tender documents den osang ajak angutsü. Iba website nungdang tender agütsütsüla. Timtem kar ajurura, IREPS indang website nung aliba help desk den tongteptsü akok.

Eligibility criteria of the work will be Item No. (1) "Any Steel Structure Fabrication and Launching Works". Item No.(2) "Any building works with framed structure".

Divl. Railway Manager (Works) Lumding
NORTHEAST FRONTIER RAILWAY
Serving Customers With A Smile

LT. MRS. TEYONGMENLA NOKDITSÜR
SÜR KÜM PEZÜ AJUNGER
(Tasüba anogo :June 3, 2013)

Na süaka temeim
anogotem mamateter.

-Temeim jala jabaso aser kinungertem.



Office of the
Warumungtsür Telongjem
Mokokchung: Nagaland
Nükjijong: *Shisatsü Agi Ayimer*

Tepela Lemsateper

Aolitsüri Wt. **Maongienla Longchar** (D/o Mr & Mrs Moachiba Longchar) la temlung lemteta Watsü Mungdang Tir asütsü maongka agütsü nung Warumungtsür Telongjem Mokokchung Town-i pelar aser tenüngsang agütsür.

Asen Aolitsür Watsü la aküm kübok temoatsü aser Tejakleni anitsü Tsüngremi maneni shisatsü aser taküm tajung moajangma ta yimtsür sarasadem.

Sd/-
T. Ayangla Ozükuma
WTMT

Office of the
Longchem Adhoc Town Committee

B.P.O. Longchem, P.O. Mangkolemba
Mokokchung : Nagaland

SANGDONGER

Japukong administrative headquarter kümteter taküm agi küm 50 abensar. Iba Golden Jubilee mong nungtem nung **March /017** ita tetenzüklen planning committee ka shima ayu. Iba committee 26 May/ 2017 anogo nung Er. Chubatoshi lenisüba kübok committee züngsem 16 tashi atenshia Longchem town Vice Chairman kidang meeting menogo. Kasa meeting nung ADC Mangkolemba, EAC Longchem aser Tzükong President atenba ajanga mapalem aser ken o ajak tiptema tempangogo. Mepaitoktetba timtem kar agi menokdangra iba Jubilee mong 19 Dec. /017 anogo nung amongtsü ta renem.

Ita ka sülen mapalem aser lemteta ayuba ken o metemshitsü asoshi ano ken meeting jazütsü lemtet. Iba kasa meeting nung teküpoklen agüja aliba adianutemi Longchem town mezüng yim kümmer tebu nung tenüng nung jubilee mong atema tenla iba amai agütsütsü ta nangzükba tepela osang sangdonger.

1. Wabong T. Imti Aier, ADC Mangkolemba tebu asür wabong Z. Toshi Aier tesayur tenüng nung Ak tayi tulu ka.
2. Wabong Ajangto Imchen aser par adianutemi tebu asür T. Tongzük Imchen DB tenüng nung Ak tayi tulu ka. Par taküm aser kibongtem Tsüngremi ano tali moajang. Adianutem kari ano yariteptsü mulunga lira lemanng sadema lapoka yutsür.

Sd/-
A. Panger Longchar
Vice Chairman
Adhoc Town Committee
Longchem

V.J'S COACHING CENTRE
D.C. COURT ROAD, DUNCAN, DIMAPUR (ESTD. 2000)

ADMISSION GOING ON

⇒ Offer Extensive Coaching for the Repeaters of
Class-X / XII-Arts / XII-Com / XII-Sci. for
Improvement & Repeaters

⇒ Hostel attached for both Boys & Girls (Separately)

Contact : 03862-248394 / 248464 / 9436600530

Lenjeter (Monthly Ao Magazine)

June Adok Vol II:9
Kaket Mulung: "Asen Lima Kümzüka Yudi"
Kaket jenjang: ` . 50/-

Kaket Mulung den itemia Keta lir :

NAI ASÜNGDANGBA LANGZÜR; TENÜKTELEN MABENSAR SAYUDAK KAKET REJU; YIMYATEM YA TAKÜM ALIBATEM AJAK ASOSHI TEMATIBA TSÜNGREMER SEMPET : T. N. Meren, IFS; SENSAXSEMBA : Class 10 & 12 nung takok angur Aor Topper asem den; TERAJEMTSÜ : Tokolok Shidoktsü ; TAJUNG TIBA KA; YAMAI SAATALOKER; OBALATSÜNGNEP: T. Senka Ao

Ano aika...
Contact: Kohima : 8414811590
Dimapur : 9862580627
Mokokchung : 9862983463

Küm 87 ajungba tepela

TASOBA ANOGO JUNE 3, 1930



Mr. R. Tongpangchiba (Merangkong)

Tsüngrem taochi nung tanü tashi anema lia arishi talang moatsü nung pa tenüng asanger. Tsüngremi ozü tsürabur anema aliba den arishi maneni moajang ta sarasadem.

Temeim Chirnurtem, Semchirtem,
Anükapang aser Kinungertem.

MAMATETER



Asür Tsungkochiba Changtongya Yimsen

Tsüngremi moatsüba akümüli wadang temer tanü (3rd June 2017) agi küm asem abensa arudang nü temeim mapatem, nü menürem jakten ajak den pela dang aliba aser nü sarasadem onoki kodanga mamateter.

Tanü na onok den meliaka nai sayubentsüba aser nü mapa tajungtem onok mulung nung teti alir.

- Temeimertem & Kinungertem.

DIMAPUR MOLUNGYIMSEN SANGLIR KIDONG
TELONGJEM-I KONANG TETUSHI AGÜTSÜR

Jala, **Jungdinaro Sanglitsür**, D/o. I. Anungba Sanglir aser Asangla Longkümstsür, Class-XII tatidang, Delhi Public School, Dimapur (AISSCE, Arts Stream) temaba jenjang top 1 (95.4%) nung takok tulu ngutetba asoshi kidongi pelaba den konang tetushi agütsür.

Talisa kinungbo sorkar aser maparen balala nung mazüngi liaka jalai takok ngutetba asoshi Mrs. Asangla Longkümstsür D/o.

Er. Mrs. Imti Longkumer (Longsa yimtiba nungi) la nem wainshin nung tetemjen tetsü konang tetushi agütsür.

Tsüngremi maneni moajangma.

Kidong tenüng nung- Sajong Sanglir, Dimapur.

OFFICE OF THE
MANGMETONG STUDENT'S UNION KOIDMA
KOHIMA : NAGALAND


Tenüngsang Agütsur

SP **Chongten Pongener**, Dr.Imtiwabang Pongener aser Mrs. T. Kithan jabasoi HSSLC (Science stream NBSE) Top-14 nung takok tulu ngua Mangmetong Student Union Kohima nem konang nüngsang bener arutsüba atema pa dang kanga pelar aser tetushi tulu agütsür. Pa wadang ano maneni Tsüngremi moajang ta sarasademtsür.

Ano kaketsür kwikati HSLC, HSSLC nung takok tulu ngutetogo ajak dang kanga pelaba metetdaksür.

Sd/-
(IMTIMAONG IMCHEN)
President

Sd/-
(MOASUNGLA)
G. Secy.



French Open 2017: Nadal, Garbine nunger takok nung lir



Nadal & Garbine (File)

Paris, June 02 (Agencies): French Open 2017 tennis tebur kija asaya nung last 16 atongsü asoshi taoba mapang iba asayamong takok tokuben tashi bena alisang, Rafael Nadal-i game ka nung dang tamakok alua Georgia nunger Nikoloz Basilashvili madak 6-0, 6-1, 6-0 agi takok angu.

"Tanü ni kanga junga asayaogo. Asüing 8:45 nung ni TV jakdang ozü telok asayaba reprangtsü, aser Real Madrid-i akoktsü imlar," ta Nadal-i iba asaya temer ashi.

Deobarnü Nadal küm 31 ajungtsü lir aser pa asoba anogomong nung Nadal ya Champions League final, Real Madrid aser Juventus tsüingta asayaba reprangtsü sentong lir.

Quarter-final atema Nadal ya par kasa lisopur, Roberto

Bautista Agut den asayatsü. Canada nunger Milos Raonic-a last 16 nung-i iogo. 2014 küm French Open nung quarter-final nung tsüksang, Raonic aser Spain nunger Guillermo Garcia-Lopez asayaba nung Raonic-i mezüing set 6-1 agi akok aser tanabuba set 1-0 lia Guillermo tetsüing yiruba ajanga asaya tenzüker minute 28buba nung iba asaya anentsüsa aküm.

Milos Raonic ya taruba asaya nung Spain nunger Pablo Carreno Busta den asayatsü. Pablo-i Bulgaria nunger Grigo Dimitrov madak 7-5, 6-3, 6-4 agi akok.

Belgium nunger David Goffin-a Argentina nunger Horacio Zeballos den tasembuba round asayaba mapang temokok yiruba ajanga

asaya tembanga masayateti anentsüsa aküm.

Suzanne Lenglen court nung asayadang Goffin-i Horacio madak 5-4 agi timba points ngur liasü.

Tetsürtem kija asaya round pezübuba nung Muguruza-i Kazakhstan tsür Yulia Putintseva madak 7-5, 6-2 agi takok angu.

Muguruza ya last eight atema France tsür Kristina Mladenovic mesüra America tsür Shelby Rogers den asayatsü.

Maneni kasa asayamong tebur kija asaya nung World No. 1, Andy Murray aser 2009 US Open Champion, Juan Martin del Potro tsüingta Honibarnü asayatsü lir.

Murray aser Argentina nunger Potro tsüingta tamalen asaya aruba nung Murray-i trokben aser Potro-i asemben koka lir.

Rio Olympics nung tena final asayaba nung Andy Murray-i Del Potro madak takok ngua liasü. Iba sülen taoba küm Davis Cup semi-final nung tena asaya aser Potro-i Rio mang yanga liasü.

"Iba asaya ya kanga tasak asütsü. Tasembuba round temela masütsü. Pa temang anema lira alima nung asayar tajungtiba rongnung ka lir," ta Murray-i Del Potro indang ashi.

Murray ya Australian Open round pezübuba nung tsük aser pa form dangi maruteti Monte Carlo, Madrid aser Rome nunga junga masayateti lir.

Saina aser Praneeth na Thailand Open semi final-i iogo

Bangkok, June 02 (Agencies): Hokolbarnü India nungi Olympic medal angur, Saina Nehwal aser B Sai Praneeth nati US sen 120000 alang Thailand Open Grand Prix Gold badminton tournament nung takok ngua semi final-i iogo.

India tsür badminton asayar jenjang 2buba aser alima nung jenjang 11buba nung alila, Saina-i Japan tsür, Haruko Suzuki madak 21-15, 20-22, 21-11 agi takok ngua tetsürtem kija asaya semi final-i iogo. Iba asaya ghonda ka ser minute teku asayaa liasü.

Iba takok anguba sülen Sania-i la indang twitter nung, "Tanü kanga saaka takok nguogo #thailandGPG #quarterfinals..... set asem nung takok angu," ta zülü.

Arishi küm 27 London Olympics medal angula, Sania-i Malaysia tsür Ying Lee madak 21-11, 21-14 agi koka quarter-final-i atua liasü aser lai semi-final nung Busanan Ongbamrunghan den asayatsü lir.

Tanep India nunger tebur badminton jenjang asembuba nung alisang, Praneeth-i Thailand nunger Kantaphon Wangcharoen madak 21-16,

21-17, agi tebur kija asaya nung takok ngua liasü.

Alima nung jenjang 24 buba nung alisang, Praneeth-i minute 50 tsüingda alima nung jenjang 102 nung alisang, Kantaphon madak takok ngua liasü.

Yaküm Indonesian Masters nung arishi küm 24, Praneeth-i Wangcharoen madak 18-21, 21-14, 21-15 agi takok anguba sülenbo tang ang tena tsüingda asayaogo.

Singapore Open champion, Wangcharoen-i yashi quarterfinals nung Malaysia nunger Iskandar Zulkarnain madak takok ngua liasü.



London, June 2 : London nung aliba The Oval ground nung June 2 anogo South Africa cricket captain, AB De Villiers-i South Africa Press Conference nung ICC Champions Trophy indang marok amer tangokba noksa nung angur.

DDBA-i Dimapur nung badminton coaching agütsüdar

Dimapur, June 02 (TYO): Badminton asayar tanurtem/lanurtem ajungshia tetoktepa balala nung shilem agütsü atema traning agütsütsü asoshi Dimapur District Badminton Association (DDBA)-i ayongzüka DDBA Indoor stadium, United colony, Nagarjan nung Brihostibarnü, June 1, 2017 nungi tenzüka ita ka piyong badminton coaching camp tenzükogo, ta DDBA Tir, Vikhugha Chophi-i metetdaksü.

Iba camp ya tetsür aser tebur naprong atema telemsa (category) balala atema katsür. Retired National badminton Umpire, C. Tinu Pongen leniba nung taoba mapang state player temi yarisema iba coaching

camp nung Dimapur district nungi asayar 30 dak tema shilem agia tendar.

DDBA Tir-isa, iba camp ya sempet aketer lanurtem nem training agüja district, state aser National level toktepa balala nung shilem agidaktsütsü nükjidong nung ayongzüker, ta metetdaksü.

Association-isa tejangrar asayartem iba camp nung adentsü jaokogo.

Tir-isa, iba camp ya taruba 41buba Inter District & State Open Badminton Championship 2017 atema district team atema-a lir, ta metetdaksü. Iba asaya ya July 11-14 anogotem nung Nagaland Police-i ayonga Chumukedima nung asayatsü.

Yitachu-i...

(TAPAK 1 NUNGI...)

ICAR-NCR on Mithun Director, Abhijit Mitra-i o jembidang, Nagaland nung Sü metsüba ajanga nübertem taküm jenjang melenshitsu teinyaktsü wadang tulu lir, ta ashi.

Sü metsürtem nem loan agütsütsü atema Institute-i bank tem dang asüingdangogo aser ano Dimapur Airport nung Sü indang kürakyanglu ka yanglutsü, ta Mitra-isa ashi.

Nagaland nung sü metsütsü ayongzüksü atema ICAR-NRC-i slogan, essay aser drawing competition tem ayongzüka agütsü, ta paisa shisem.

Iba anogomung nüngtem nung staff tajungtem nem sempet agütsü, temeket aliba yimtsüngtem nem süngdong agütsü aser Medziphema yimtsüng nem semi-intensive rearing atema Sü pungu agütsü.

Naga yimten telatetba...

(TAPAK 1 NUNGI...)

Naga yimten nüjiso atema küm 50 dak tali rarar külen India government-i ken o lemtepdaki jaok nungji Naga nungertemi agizükogo, kechiyong India-i Naga yimten tebilemtsü ya prangpong injang agi makoktsü ta angateta aru. Iba sülen taoba küm 20 shi Naga yimten tebilemtsü onük ya India ato kilonser trok tashi den jembia aruba sülen 'Framework Agreement' yangluba ya yimten anaprongla asoshi takok liasü. Ibaji ajanga Naga nungertem ya India nunger masü saka sobaliba aser otsü kenyongi

balaka ta India-i agizükogo, ta NSCN-IM sangdong ka ajangasa metetdaksü.

Iba ama jenjang ka tashi tongteta jembitetba ya Naga nunger lokti tenet aser arogoi yariba ajanga asütsü ta NSCN-IM telokisa pelaba metetdaksü.

Naga yimten tebilemtsü tatembang küma latettsü mapang anasai arur aser iba ama mapang ka nung nisung shingaia nübertem manisatsü mepishir aser NSCN/GPRN kishi ajak asoshi teti lapoka lir ta NSCN/GPRN MIP sangdong ajangasa metetdaksüogo.

Bihar nung Class 12 topper...

(TAPAK 1 NUNGI...)

Iba sülen TV news channel kati Ganesh Kumar den sensaksem dang, pai tazüingba tsütsü telangzüba shitak magütsütetba osangtem prokshiba sülen tanü BSEB-i iba telemtetba agütsüsa aküm.

Ganesh-i humanities stream nung 82.6% nguteta mezüingbuba jenjang takok angu. Pai Music indang practical examination nung marks 70 nungi 65 angu aser theory nung 20 nungi 18 angu. Paisa Hindi nung marks 100 nungi 92 nguteta liasü.

Ajisüaka, osangbenertemi pa dang pai agiba subject tem indang asüingdangdang, telangzüba shitak magütsütet aser Music practicals nung komaser pai junga shilem agi ta metetnüa asüingdangdang, Ganesh-i Bollywood ken ka tensaa aten.

Ganesh ya Jharkhand kübok



Giridih nungi lir aser pai ashiba agi, küm ishika tejaklen pa mapa inyaktsü atema Bihar-i aru aser nisung kari pa dang school nung admit asütsü atema ashiba agi admission asü.

Ajisüaka, school ketdangsertemi ashiba agi, Ganesh-i pa sasa mulungteta admission asü.

Iba ashishitep ken o adokba sülen school-i Ganesh nem tenüngsang agütsüba sentong ka agütsü aliba thiogo.

BILEMDANGANG
"Tanemi jembiang, meilongi jembiang aser tali jembi"